

Masyarakat jahil sentiasa ditindas

22 JAN 1988

ASSALAMUALAIKUM warahmatullahi wabaraka-
tuh dan salam sejahtera.

Saya berasa sukacita dapat melancarkan Tahun
Pembaca 1988 ini. Tema Tahun Pembaca ini ialah
"Membaca Jambatan Ilmu".

Tema ini amat tepat sekali. Walaupun ilmu penge-
tahuan boleh didapati melalui pengalaman seseo-
rang dan asuhan secara lisan oleh ahli pemikir yang
terkenal, seperti di zaman purba, tetapi kemudahan
mencetak telah memudahkan pengumpulan ilmu dal-
am buku-buku yang boleh dibaca oleh sesiapa sahaja
yang berminat. Daripada buku segala ilmu boleh di-
pelajari tanpa persekolahan atau asuhan secara for-
mal.

Di zaman moden ini, buku mengenai apa jua ilmu
serta buku-buku cerita boleh didapati di mana-mana
sahaja. Harga buku amatlah murah berbanding
dengan ilmu yang terkandung di dalamnya. Kedai-
kedai buku membekal ribuan buku dengan pelbagai
tajuk, sehingga dengan perbelanjaan sedikit sahaja
kita dapat mendalami seribu satu bidang ilmu yang
memperkayakan akal fikiran kita. Hanya yang diper-
lukan ialah minat membaca oleh kita.

Tetapi kita tidak harus lupa bahawa di zaman da-
hulu buku tidak begitu mudah didapati. Ia dianggap
sebagai alat pengetahuan yang ajaib dan terhad ke-
pada orang-orang tertentu sahaja. Kulit-kulit buku
dahulu disalut dengan logam dan mempunyai kunci
supaya hanya orang tertentu membaca buku dan
membaca isi kandungannya. Ini adalah kerana isi
kandungan buku memberi pengetahuan yang ditegah
bagi orang biasa. Sebabnya ialah kerana pengeta-
huan yang mungkin didapati dipercayai boleh mem-
beri kuasa istimewa kepada pemilikinya.

Hari ini tidak ada lagi larangan bagi sesiapa pun
untuk membaca dan menerap apa juga ilmu dalam
mana-mana buku. Yang dahulu dilarang, sekarang
sudah didedah dan dibukakan kepada sesiapa sahaja
yang ingin mengetahuinya. Bagi manusia yang ber-
syukur, peluang keemasan ini tidak boleh dilepaskan.
Secara kebetulan, membaca dan menerap ilmu
dengan mudah ini adalah satu nikmat yang perlu kita
hargai dan kita gunakan dengan sepenuhnya.

Masyarakat yang jahil tidak akan mengecapi keba-
hagiaan. Mereka akan hidup untuk makan, minum,
tidur dan memenuhi nafsu sahaja. Masyarakat yang
hidup kerana memenuhi nafsu semata-mata akan di-
tindas dan diperalatkan oleh orang yang berpengeta-
huan. Mereka akan diperhambakan. Mereka akan
menjadi masyarakat yang tidak bermaruah.

Di zaman di mana segala ilmu dibukukan dan
banyak terdapat kemudahan membaca, tidak ada
alasan bagi mana-mana masyarakat menjadi jahil.
Sudah tentu di Malaysia, di mana pelajaran asas bo-
leh didapati secara percuma, kegagalan menimba
ilmu daripada buku-buku tidak boleh dipertahankan.

Sudah tentu tidak ada sesiapa pun yang boleh men-
dalaminya semua ilmu yang dapat diperolehi sekarang.
Tetapi, rakyat di negara yang ingin maju mestilah
faham dengan lebih luas akan perkembangan-per-
kembangan yang mempunyai kesan terhadap kehi-
dupan mereka. Ini bermakna kefahaman serba sedi-
kit berkenaan alam sekeliling, sejarah, sains dan
teknologi dan agama. Rakyat yang lebih berpengeta-
huan akan menjadi lebih waras dan lebih cekap da-
lam mempertimbangkan reaksinya terhadap segala
kejadian dan tindakan yang mempunyai kesan kepa-
da dirinya dan kepada masyarakat. Sudah tentu
masyarakat yang dianggotai oleh rakyat yang waras
dan bertanggungjawab akan menjadi lebih maju dan
bahagia.

Dr. Mahathir
● Masyarakat yang jahil
tidak akan mengecapi
kebahagiaan. Mereka
akan hidup untuk makan,
minum, tidur dan
memenuhi nafsu sahaja

yang berilmu. Warganegara yang jahil tidak dengan
sendirinya menjadi warganegara yang setia. Demik-
ian juga warganegara yang boleh bertutur lebih da-
ripada satu bahasa tidak semestinya tidak setia. Jika
kerana mengejar ilmu kita perlu menguasai bahasa-
bahasa lain, kita tidak harus teragak-agak mengu-
asai bahasa-bahasa ini. Dengan keupayaan membaca
buku dalam bahasa lain, kita akan memperolehi gan-
jaran yang tidak ternilai harganya. Jika ilmu yang
kita perolehi dalam bahasa lain diedarkan pula da-
lam bahasa kita sendiri, maka akan bertambah kukuh
dan berkesanlah bahasa kita.

Maklumat yang kita perolehi menunjukkan baha-
wa ramai daripada penuntut kita membaca hanya
buku teks mereka sahaja. Sebahagian besar daripada
mereka yang tamat pelajaran, di semua peringkat,
tidak membaca buku lagi, walaupun akhbar biasanya
menarik minat mereka. Keadaan ini menyedihkan.
Demikianlah keadaannya sehingga kerajaan ter-
paksa mensyaratkan bahawa hanya calon yang
membaca sekurang-kurangnya tiga buku, yang bu-
kan buku teks, akan dipilih menjadi guru. Alangkah
sedihnya kerana kita terpaksa mengupah untuk me-
tentukan kita membaca. Sepatutnya di Malaysia
yang mewah dengan bahan-bahan bacaan, kita
mensyaratkan hanya mereka yang banyak membaca
buku sahaja yang akan dipilih untuk sesuatu jawat-
tan.

Minat membaca ini perlu dipupuk daripada bangku
sekolah lagi. Sepatutnya murid atau penuntut tamat
membaca sekali lalu semua buku teks mereka pada
bulan pertama buku itu didapati. Sepatutnya semua
murid meminjam buku perpustakaan untuk dibaca di
rumah. Sepatutnya waktu rehat digunakan juga un-
tuk membaca di perpustakaan.

Dalam usaha menyemai minat membaca ini, guru
harus memainkan tugas utama. Pelajar yang mem-
baca buku selain daripada buku teks mestilah diberi
kepujian. Jika ia menggunakan buku-buku ini seba-
gai sumber dalam rencana atau apa juga kegiatan
pelajaran, ini sepatutnya diiktirafkan.

Saya percaya ramai orang suka membaca tetapi
menghadapi masalah tidak tahu apakah buku-buku
terutamanya buku-buku baru yang diterbitkan di ne-
gara ini. Ini ialah kerana maklumat atau publisiti
mengenai buku-buku itu tidak mencukupi. Pembaca
terpaksa mencari-cari buku di kedai buku, dan ma-
nganya tidak semua kedai ada menyimpan atau
menjual buku-buku itu. Lagipun, kedai-kedai buku le-
bih banyak terdapat di kawasan bandar, dan jarang
atau tidak terdapat di luar bandar. Jadi sukurlah
pembeli hendak mendapatkan buku-buku yang
mungkin mereka ingin beli atau baca.

Untuk mengatasi masalah ini, saya syorkan supa-
ya Majlis Kemajuan Buku Kebangsaan (MKBK)
atau Persatuan Penerbit Buku mengeluarkan kata-
log buku baru tiap-tiap tahun untuk diedarkan pecu-

Penerapan ilmu daripada buku-buku tidak bermakna membaca buku-buku yang khusus untuk ilmu-ilmu tertentu. Buku-buku novel juga dapat membekalkan pelbagai ilmu kepada pembacanya. Di samping itu, kita dapat mengenali pemikiran penulis dan falsafahnya. Banyak daripada cerita-cerita yang dihasilkan oleh penulis-penulis terkenal seperti Tolstoy, Dickens, Pramodya, Shanon dan lain-lain mempunyai analisa sosial yang mempengaruhi aliran pemikiran dan pembangunan masyarakat di zaman-zaman tertentu.

Untuk memperoleh ilmu, kita tidak boleh memiliki nasionalisme yang terlalu sempit. Sepertimana juga kita sanggup menjelajah ke negara jauh dan menguasai bahasa-bahasa asing untuk mendapat ilmu, begitu juga kita harus menguasai bahasa-bahasa lain untuk membaca buku-buku dalam bahasa asing.

Walau bagaimana kita berusaha sekalipun, tidak mungkin kita boleh mengalih-bahasakan semua buku di dunia. Oleh itu, untuk mendapat faedah daripada pembacaan buku, penguasaan bahasa-bahasa asing amatlah penting. Jika kita ingin menterjemahkan buku bahasa asing sekalipun, kefasihan dalam bahasa-bahasa asing adalah perlu. Di zaman moden ini, orang yang berilmu mesti menguasai sekurang-kurangnya dua bahasa — iaitu bahasa ibunda atau bahasa kebangsaannya dan satu lagi bahasa asing. Orang biasa juga perlu mengetahui sedikit-sebanyak bahasa asing. Dengan itu, maka akan terbukalah sumber ilmu yang lebih luas kepadanya — terutama melalui pembacaan buku-buku dalam bahasa asing. Semangat kebangsaan seseorang itu tidak akan terjejas kerana ia faham dua atau tiga bahasa. Yang penting ialah ia tidak membelakangkan bahasanya sendiri. Yang penting ialah ia menjadi warganegara

ma atau dijual dengan harga yang berpatutan kepada orang ramai bagi panduan mereka. Saya difahamkan bahawa MKBK sedang menyusun satu katalog buku kebangsaan dan juga akan menerbitkan sebuah Berita Buku tidak lama lagi. Langkah-langkah ini akan menolong pembaca. Di samping itu, fungsi akhbar yang sekarang membuat ulasan mengenai buku-buku baru haruslah dipertingkatkan. Satu halaman patutlah dikhaskan kepada ringkasan buku-buku yang dianggap bermutu tinggi, jika tidak oleh akhbar harian sekurang-kurangnya oleh akhbar mingguan. Kita tidak patut lupa bahawa akhbar juga adalah bahan bacaan. Jika teknik akhbar digunakan untuk mempopularkan bacaan rencana yang berilmiah, tidak dapat tidak negara akan mendapat banyak manfaat dan minat membaca akan dipertingkatkan.

Mungkin ada baiknya juga buku umum untuk bacaan orang ramai diterbitkan dalam bentuk yang murah, misalnya dalam edisi 'paperback'. Ini akan membolehkan lebih ramai lagi orang membeli buku. Di samping itu, lebih banyak buku terjemahan daripada bahasa asing hendaklah diterbitkan, terutama karya oleh penulis-penulis terkemuka dari seluruh dunia. Kerajaan sedia menimbang untuk membantu usaha ini.

Saya berharap saudara-saudari dapat menjadikan buku sebagai teman hidup sehari-hari, kerana buku adalah jambatan ilmu yang dapat menghubungkan kita dengan alam persekitaran kita, dengan masyarakat kita, dengan negara kita dan dengan dunia luar. Melalui buku dan pembacaan, kita akan dapat membentuk suatu budaya dan tradisi nilai dan pemikiran bangsa yang akan menjadi asas kekuatan bangsa dan negara.

Dengan ini saya dengan sukacitanya melancarkan Tahun Pembaca 1988.